



**Komunikadu Imprensa**  
**Tribunál Judisiál Primeira Instánsia Dili**  
**20 Novembru 2024**

**JSMP ezije Tribunál avalia no konsidera faktu no sirkunstánsia relevante sira iha kazu ho natureza seksuál antes halo desizaun**

Iha 8 Novembru 2024, Tribunál Judisiál Primeira Instánsia Dili absolve arguidu ba kazu aktu seksuál ho adolexente ho agravasaun iha natureza violénsia doméstika tanba laiha prova sufisiente. Kazu ne'e envolve arguidu SB hasoru nia subriña ho idade (tinan 15), iha Munisípiu Ermera.

JSMP ezije Tribunál atu avalia no apresia profundamente faktu no sirkunstánsia relevante no asosiadu iha kazu sira ho natureza seksuál atu asegura katak desizaun ne'e reprezenta justisa ba grupu vulneral sira.

“JSMP fiar katak kazu ne'e envolve tipu krime lubuk ida ne'ebé permite atu akuza ho krime konkursu bainhira prokuradór esplora no avalia adekuadamente sekuénsia istoria, faktu no sirkunstánsia relevante sira hosi kazu ne'e”, dehan Sr. Casimiro dos Santos, Diretór Ezekutivu Interinu JSMP.

Iha kazu sira natureza violasaun seksuál normalmente ofendida sira enfrenta dezafiu kulturál no estrutural oioin inklui presaun psikolójiku, estigma sosiál, no hasoru todan traumátiku oioin tanba relasaun podér ne'ebé la hanesan iha familia no sosiedade. Aleinde kapasidade no koñesementu ofendida sira atu asegura prova no rekizitus formalidade téknika sira tuir lei haruka nu'udar preukupasaun relevante seluk atu konsidera. Tribunál tenke sensível ho realidade sosiál timor atu reflète desizaun sira ne'ebé tribunál deside nune'e desizaun sira iha kredibilidade no hetan respeitu iha sosiedade. Tribunál no autoridade judisiáriu sira la fasilmente deside kazu ho natureza kompleksu sira ho de'it prova únika hanesan saida mak akontese ba kazu ne'e. JSMP espera katak prokuradór titulár sei halo esforsu tomak no lori desizaun ne'e ba iha tribunál rekursu hodi asegura ofendida nia direitu ba justisa.

**Iha faktu relevante lubuk ida ne'ebé tribunál presiza ezamina aproriadamente – antes tribunál konklui katak krime ne'e la akontese hodi absolve arguidu;**

1. Iha kazu ne'e hatudu katak ofendida konsistentemente deklara katak arguidu ameasa ka sempre ameasa atu oho ofendida bainhira nia keisa ka fó hatene sai ba ema ruma no prokuradór no tribunál falla atu avalia istória relevante no sirkunstánsia sira hosi kazu ne'e.
2. Prokuradór konsiente no admite katak krime akontese duni, maibé la sustenta argumentu ne'e hodi elabora alegasaun ida forti no rigor atu konvense juis koletivu sira atu foti desizaun ne'ebé justu ba ofendida.

3. Prokuradór no tribunál la avalia faktu hosi deklarasaun ofendida ne'ebé deklarasaun ofendida la iha problema ruma ho arguidu no arguidu mak sustenta sira depois nia aman mate. Tuir loloos tribunál tenke kestiona no analiza faktu sira ne'ebé mai hosi deklarasaun ofendida ne'ebé deklarasaun arguidu mak tau-matan no sustenta nia moris no finansia nia eskola, no durante ne'e la iha problema ruma, maibé tanbasa mak nia bele halo alegasaun falsa hasoru arguidu, bainhira la iha razaun no fundamentu ruma.

4. JSMP mós preukupa se tribunál konsidera rezultadu teste DNA nu'udar prova úniku hodi absolve arguidu, enkuantu ofendida mantein ninia pozisaun durante investigasaun no produsaun ba prova iha tribunál. JSMP entende katak prova DNA ne'e iha relevansia liuba prosesu investigasaun parternal duke iha kazu krime.

5. JSMP fiar katak embora rezultadu teste DNA negativu, maibé ne'e la signifika katak arguidu la komete krime ne'ebé alega ba arguidu. Iha faktu sira hatudu arguidu aproveita nia autoridade hodi halo abuzu oiain hasoru ofendida. Tuir loloos, prokuradór tenke konsidera atu akuza arguidu ho krime konkursu tanba iha faktu kona-ba ameasa, abuzu no violasaun seksuál (artigu 172 KP) ho agravasaun tuir artigu 173 nú. 1 letra a no d.

Iha kazu ne'e, Prokuradór akuza katak maizumenus iha fulan Setembru 2016, arguidu nia feen ho ofendida nia inan ba halo lia iha foho no arguidu nia oan sira ho ofendida ba hotu eskola. Bainhira ofendida fila hosi eskola, arguidu tuir ofendida ba kuartu laran no ko'alia ba ofendida katak "ha'u la fó han ó saugati de'it". Hafoin arguidu ho forsa obriga kolu ofendida nia roupa no dudu ofendida ba kama laran no halo relasaun seksuál ho ofendida. Iha momentu ne'ebá ofendida sente moras no hakilar maibé arguidu ameasa katak "se hakilar ha'u oho tiha ó!". Agresaun ne'e rezulta ofendida sofre raan sai barak hosi nia vajina maibé ofendida nonok de'it tanba arguidu ameasa atu oho ofendida bainhira ofendida dehan ba ema seluk. Ofendida sente nia kelen sira moras no la bele lao, nune'e toba de'it iha nia kuartu to'o lokraik. Bainhira arguidu nia oan sira fila hosi eskola no husu tanbasa nia toba de'it no lahader, ofendida hatan de'it katak nia moras hela.

Maizumenus iha fulan Outubru 2016, arguidu ho ofendida mesak iha uma, arguidu haruka ofendida dasa foer iha uma laran no bainhira dasa to'o iha arguidu nia kuartu laran, derepente arguidu mosu hosi odamatan kuartu nian, ofendida hakfodak atu halai sai maibé arguidu tahan ofendida ho nia liman, kaer ofendida nia liman no obriga ofendida kolu nia roupa no ho forsa halo relasaun seksuál ho ofendida. Iha akontesimentu hirak-ne'e, ofendida la fó hetene ba nia inan no inan ki'ik tanba ta'uk. Arguidu ho ofendida kontinua halo relasaun seksuál hanesan feen la'en kuandu família sira hotu laiha uma no relasaun seksuál ne'e akontese bebeik to'o ofendida isin-rua.

Hafoin deskobre katak ofendida isin-rua no familia sira husu-tuir ba ofendida mak ofendida hateten katak arguidu mak halo ofendida isin-rua. Ofendida hahoris oan feto ida ho idade tinan 15.

Prokuradór akuza arguidu kontra artigu 178 KP kona-ba aktu seksuál ho adolexente no artigu 182 Nú. 1 alinea (b) KP kona-ba agravasaun.

Iha julgamentu arguidu nega faktu hotu iha akuzasaun no deklarata katak nunka halo hahalok aat ne'e hasoru ofendida. Arguidu deklarata katak hafoin ofendida nia aman mate, ofendida ho nia inan hela hamutuk ho arguidu no arguidu ho nia feen mak sustena sira inklui finansia ofendida nia eskola. Arguidu jura no deklarata katak nia nunka halo hahalok aat ne'e hasoru ofendida.

Iha parte seluk, ofendida konfirma faktu hotu iha akuzasaun no deklarata katak nia halo de'it relasaun seksuál ho arguidu no nunka halo relasaun seksuál ho mane seluk. Ofendida mós deklarata katak nia la fo hatene ba nia inan no nia inan ki'ik tanba ta'uk arguidu ameasa atu oho ofendida.

Testemuña sira depoimenta katak sira la haree akontesimentu ne'e maibé bainhira ofendida isin-rua mak testemuña sira husu no ofendida hateten katak labarik iha kanotak ne'e nia apa ki'ik nian (arguidu) nune'e sira ba aprezena keixa iha polisia. Iha tinan 2018, tribunál halo ona julgamentu ba kazu ne'e no lori ofendida nia oan nia raan no arguidu nia ran, kaben no fuuk ba teste DNA iha Portugal no rezultadu hosi teste ne'e hatudu katak negativu (ofendida ko'ús hosi mane seluk la'os ba arguidu).

Iha alegasaun finál prokuradór haktuir katak rezultadu iha produsaun ba prova arguidu nega faktu hotu iha akuzasaun, no rezultadu teste DNA mós hatudu katak ofendida ko'ús hosi mane seluk. Mezmu nune'e prokuradór entende katak arguidu halo duni relasaun seksuál ho ofendida tanba ofendida deklarata momós katak durante ne'e ofendida halo de'it relasaun seksuál ho arguidu no nunka halo relasaun seksuál ho mane seluk. Tanba ne'e husu ba tribunál atu tetu no decide tuir tribunál nia konviksaun.

Enkuantu, iha defeza nia alegasaun haktuir katak prova la sufisiénte no teste DNA hatudu momós katak labarik ne'ebé ofendida ko'ús ne'e la'ós arguidu nian. Arguidu mós jura iha tribunál katak nia nunka halo hahalok aat ne'e hasoru ofendida. Defeza konsidera prova laiha tanba ne'e husu atu absolve arguidu hosi krime ne'e.

Hafoin halo avaliasaun ba faktu hotu-hotu, tribunál konklui katak laiha prova adekuada atu kondena arguidu tanba arguidu nega total faktu sira iha akuzasaun, maske ofendida mak konfirma faktu sira iha akuzasaun. Aleinde ne'e, sasin sira ne'ebé prokuradór arola mós la haree ho matan ba akontesimentu ne'e no teste DNA negativu, nune'e tribunál decide hodi absolve arguidu hosi krime ne'e.

Kazu ne'e rejista iha tribunál ho Nú. Prosesu: 0105/17 ERSIK. Julgamentu leitura akordaun ne'e prezide hosi juis koletivu: Dra. Ana Paula Fonseca, Dra. Ersilia de Jesus no Dr. José Gonçalves. Enkuantu prokuradór reprezenta hosi Dr. Ricardo Leite Godiño no arguidu hetan defeza hosi Dr. Manuel Gonçalves hosi Advogadu Privadu.

Atu hetan informasaun kompletu favor kontaktu:

Casimiro dos Santos

Diretór Ezekutivu Interinu JSMP

Diresaun e-mail: casimiro@jsmp.tl

Telefone: (+670) 33238883/77257466

Website: <https://jsmp.tl>  
info@jsmp.tl